



斷心

屋前細細仔个花臺，佢還言有想著愛種麼个花，就先種落兩頭大笏瓜、一頭七層塔還有一頭辣椒仔。個零月過後，大笏瓜个藤開始攀上木窗頂項，緊攀緊高。一節一節个瓜藤愛拿索仔來綑，正有法度同佢固定，係講起大風、落大雨，藤葉乜毋會晃上晃下、晃去晃轉。恁樣，正做得分佢較好、較穩定个生長環境。

緊攀緊高个笏瓜藤，一無注意就递到半天高，路過个阿伯講，愛同佢「斷心」，藤葉正毋會緊綻等上，毋會到時綁也難綁、摘也難摘，毋知愛仰結煞正好！佢問阿伯：「麼个安到斷心？」阿伯講：「該就像同瓜藤最尾項个藤心，同佢斷一細截下來」。藤心斷忒，養分就會捫轉瓜藤項去，下背个瓜藤、瓜葉，尤其係正飆出來个笏瓜，過無兩三日，就會大起來，就像旁雞胥仔樣，兩下半就鼓起來。養分係罇足，還有可能綻出新藤，做得打還較多个笏瓜，收成還較多个大笏瓜。

佢認真同最頂高个心斷一細截，續後瓜藤就無再過蹶上天，正打个笏瓜正經大到當遽（應該毋係吾个心理作用正著！），朝晨臨暗到這附近行路个鄰舍，看著吾花臺頂高打个笏瓜就講「恁會喔！笏瓜種到恁靚！」佢心肚當暢，又毋敢表現出該有个奢鼻，總係笑微微仔！過無幾多日，新个藤又綻出來哩！佢心肝肚緊來緊清楚，該教佢斷心个阿伯，實在盡有耕園種菜个學問。

斷心抑係無愛斷心，兩種無共樣个選擇，無共樣个選擇，就會有無共樣个結果。買麼个瓜秧，種到麼个地方，地土有幾多養分，用麼个肥，淋幾多水，麼个天時……？這兜複雜个因素，有兜做得去擇，有兜無法度去選，全全會來影響著瓜仔个生長同結果。一頭瓜仔，影響厥生長个因素有恁多，一儕人个成長、養成、價值觀念，影響厥个因素，恁去恁轉，做得選、無法度擇个，實在也盡複雜，無恁該同佢理解！

作者：邱一帆

☆詞彙學習☆

【斷心】don`xim`：截斷嫩葉或新芽。

【仰結煞】ngiong gad` sad`：怎麼辦。表示

【個零月】ge lang` ngied / gai lang` ngied：

不知如何是好。

一個多月。

【捫轉】giug zon`：運回養分。

【索仔】sog`e`：繩子。

【兩下半】liong` ha ban：一下子。

【递】tai`：藤葉蔓延。

【奢鼻】sa` pi：得意驕傲的樣子。

☆文法學習☆

【緊攀緊高】gin` pan` gin` go`：越爬越高。四縣客家語中，「緊」本義為「一直」，表示動作持續進行，如文中「緊綻等上（一直往上長）」。而「緊 V 動詞 緊 C 補語」、「緊來緊……」的構式，則延伸表示「越 V 動詞 越 C 補語」、「越來越……」。

例 1：細笏瓜藤緊攀緊高，毋知愛攀到哪位？（小黃瓜藤越爬越高，不知要爬到哪裡？）

例 2：冬至過後，日仔會緊來緊長。（冬至過後，白晝會越來越長。）